

重修滄浪橋記

滄浪橋三世祖英仲公所修也先是始祖端公事唐有功勅鎮潭州嗣因年老解組遂居於星沙之滄浪溪其時富甲都邑環溪左右盡屬吾陳氏莊業故先人廬墓多在是焉三世祖因溪水深洪行人病涉遂創修虹橋題其柱曰滄浪橋此滄浪橋之所由昉也厥後世代久遠子姓星居而橋漸傾圯子孫廬其近者目擊心傷遠者幾數典而忘也歲乙卯族正等倡議重修謀諸各祠僉應之曰善踴躍從其明年醵金若干於傾圯者重爲補葺之至戊午始蒞事繼祖志兼以利往來也其橋在長邑清

泰都七甲清泰都卽舊霧陽鄉也橋東達瀏陽南通省會西鄰
湘邑北至巴平先人之修是橋也夫固有深意存焉茲當與修
家乘爰紀其實以示後人後之人當無不體當日創修之德意
與今日續修之苦心而保守培護之或疎者

咸豐己未歲三十七派孫兆鰲謹記